

Mayoria di caso di anulacion di matrimonio Catolico ta di Aruba y Corsou

ORANJESTAD – Solicitud di anulacion di matrimonio Catolico na Aruba ta hopi. Asina Reverendo Canuto F. Fuentesbella kende ta Presidente di e Tribunal Eclesiastico di Diocesis Willemstad cu ta inclui Aruba, a declara na Bon Dia Aruba.

Reverendo Canuto Fuentesbella cariñosamente conoci como Pader Toti di parokia di Paradera ta hues di e tribunal Diocesis di Willemstad, y e ta atende hunto cu dos hues mas di e tribunal, e solicitud di anulacion di matrimonio di seis isla. Nan ta atende entre 20 pa 30 caso pa aña di henter nos Diocesis. E mayoria di caso di anulacion ta di Aruba y Corsou, aunke Corsou ta mas hopi cu nos pais. E ta haya algun peticion cu ta bin for di Bonaire, tambe algun caso for di St. Maarten.

Procedura riguroso

Nan ta reuni na Corsou, aunke pader Toti kende ta abogado di Derecho Canonico tin un privilegio cu a wordo duna di Roma pa e por fungi absolutamente como presidente y ponente di cada caso. Como ponente e tin e trabou di instrui e caso. Nan tin un tribunal di tres hues y cada un di nan ta firma e sentencia.

E proceso di anulacion di matrimonio Catolico ta hopi riguroso. El a informa cu nan ta un tribunal di prome instancia y segun nan lei di procedura, unda bes cu nan ta

tuma un decision automaticamente e ta bay pa e Corte di Apelacion na Arkidiocesis di Kingston na Jamaica.

Pader Toti a aclara cu e decision aki ta bay automaticamente pa e Corte di Apelacion, ya cu Iglesia como institucion moral nan tin cu salvaguardia e santidad, dignidad y respet di e sacramento di matrimonio.

Decreto di declara nulo

Den caso cu si nan no ta haya confirmacion di e sentencia dilanti di e Corte di Apelacion, e decision no ta finalisa, ya cu e sentencia mester tin dos decision confirma di ambos Corte, esun na Corsou y esun na Jamaica. Den un caso pa ehemplo cu e decision di tribunal di nos Diocesis ta afirmativo y esun di Corte di Apelacion na Jamaica ta afirmativo, e caso ta finalisa. Pero si un ta afirmativo y otro negativo, e caso ta wordo manda pa Roma.

Pader Toti ta prefera di papia no di anulacion di matrimonio sino decreto di declara nulo. E ta splica cu decreto di declara nulo e palabra “nulo” ta nifica cu for di principio no tin matrimonio all. E sentencia cu nan ta duna ta esun di nulo y no tin validez for di principio.

Igualmente e ta distingui e palabra divorcio for di decreto di declara nulo pa Iglesia. E ta bisa cu for di principio Dios a institui matrimonio no pa disolve pasobra e el-



emento esencial di matrimonio di misa no por wordo poni riba disolucion. Pa ley Civil si por papia di divorcio y disolucion di matrimonio.

Den cada caso ta ser evalua strictamente si a ser exclui un di e elementonan special di matrimonio. Riba esey nan tin un lei di procedura riguroso cu ta ser amplio den e codigo di Derecho Canonico pa evita abuso y salvaguardia e derecho di cada partido; y otro factor ta pa sirbi husticia; pero tambe pa evita corrupcion.

Proceso pastoral

Tambe prome cu nan ta studia un caso tin algun proceso pastoral anteriormente, un di nan ta pa wak si e dos par-

tido por reconcilia prome. Si acaso nan a yega na un punto cu no tin reconciliacion e ora ey, nan ta haci investigacion profundo. E investigacion aki ta wordo protegi debidamente prome cu nan ta yega na un decision.

Propiedad esencial di matrimonio

Tin cierto puntonan esencial of propiedadnan esencial den matrimonio, un di nan tin di haber cu bienestar di ambos banda. Si un ta abusa di oro of maltrata otro of mal uza otro, of insulta bo no ta cuidando e bienestar di bo partner of casa. Otro punto esencial ta cu e matrimonio a wordo institui pa tin famia of haya yiu. Esaki no kiermen haci baby pa loco, sino cu e mester ta un paternidad responsabel.

Como tata y mama Cristian ta nan deber pa lanta yiu segun enseñansa di Iglesia. E di tres ta fidelidad, esaki ta nifica cu bo a priminti dilanti Dios cu bo ta bira fiel na bo casa.

Pader Toti a enfatisa riba e punto aki riba cada casamento den misa pasobra den nos realidad Caribeño e falta di fidelidad a bira e motibo principal di e fracaso di matrimonio. “Un di nan ta bira infiel. Tambe abuso, machismo tambe ta un problema di nos cultura di nos comunidad”.

Otro elemento cu ta wordo evalua pa declara nulo un matrimonio Catolico ta esun di impedimento. Un ehemplo di esaki ta ora cu un di e partner a wordo casa bou

presion, miedo y forsa. Of persona cu a wordo casa bou edad di pa ehemplo 13 pa 14, algo asina ta ser declara nulo for di principio, ya cu esaki contra di e rekisito di edad. Akinan ta Aruba e edad estableci ta 18 pa hende muhe y 21 pa hende homber.

Otro impedimento ta cu primo y prima no por casa. Otro impedimento ta si e hende homber ta impotente ya cu un di e meta di e matrimonio ta tene yiu. Otro impedimento ta ora cu bo ta casa caba pa misa mas cu e no a consumi; of si bo ta casa cu un persona cu a ser secuestra pa bay casa. Nan ta impedimento cu ta wordo evalua tambe pa considera nulo un matrimonio Catolico. □